

Pablo Éfesocjārārē ojāca pūrĩ ni'i

A'ti pūrĩ a'tiro weero ojano'pā nise ni'i

Pablo a'ti pūrĩrē bu'iri da'leri wi'ip̃a nígũ, ojacu niwĩ. Apetero weegu Romap̃a nígũ, ojacu ojapĩ.

A'ti pūrĩrē Ō'acũ cũ weesĩ'rĩ'caronojōta cũ ɰaritero nicā, nipe'tirārē, nipe'tisere Jesucristo doca tojacā weegusami nisere ojacu niwĩ. Tojo nicā judío masā, judío masā nitirārē Jesucristo me'rā ni'cā up̃ata nima nisere ojacu niwĩ. M̃sā weesetisere ni'cā wi'icjārā Ō'acũ ya curuacjārā weronojō weeroua'a nisere ojacu niwĩ. Ña'arō weesere cā'mota'aroua'a nisere ojacu niwĩ.

*Pablo Jesucristore ějōpeori curuacjārā
Éfesop̃a nirārē oja'que ni'i*

¹ Ỹu'u Pablo Jesucristo besecũú'cu ni'i. Cũ yu'ure Ō'acũ ɰa'caronojōta cũ ye quetire weredutigu cūuwĩ. M̃sā Ō'acũ yarārē, Éfesop̃a nirārē añuduti'i. M̃sā Jesucristore ějōpeonu'cũ'u.

² M̃sārē Ō'acũ marĩ pacu, Jesucristo marĩ wioгу añurō weeato. M̃sārē ejerisājācā weeato.

Cristo me'rā Ō'acũ marĩrē añurō wee'que ni'i

³ Ō'acũ, marĩ wioгу Jesucristo pacure e'catise o'orā. Cristo yarā niyucā, Ō'acũ marĩrē añurō

weecu niwĩ. Marĩrẽ ma'ígũ, nipe'tise ʉ'musepu ejeripõ'rã cjase añusere o'ocu niwĩ.

⁴ A'ti turi weese duporo cũ marĩrẽ beseyuto-jacu niwĩ. Cristore ejõpeorã cũ yarã sãjãrãsama ni wãcũgũ, tojo besecu niwĩ. Marĩrẽ cũ ĩ'orõpũre añurã, bu'iri moorã niato nígũ tojo weecu niwĩ. ⁵ Duporopũ cũ marĩrẽ ma'ígũ, cũ põ'rã wa'arãsama, nitojacu niwĩ. Jesucristore ejõpeoato nígũ marĩrẽ tojo weecu niwĩ. Tere wéégũ, cũ weesĩ'rĩ'caronojõta weecu niwĩ.

⁶ Cũ macũ cũ ʉputũ ma'ígũ me'rã marĩrẽ añurõ weecu niwĩ. Tojo weerã cũ marĩrẽ añurõ wee'quere wãcũrã, cũrẽ e'catipeonu'cũ'u.

⁷⁻⁸ Õ'acũ marĩrẽ ʉputũ ma'ígũ, cũ macũrẽ o'ocu niwĩ. Cũ curusapũ wẽrĩse me'rã, cũ ye dí o'mabũrose me'rã marĩ ña'arõ wee'que wapare wapayecu niwĩ. Te me'rã Õ'acũ marĩ ña'arõ wee'quere acobojocu niwĩ. Marĩrẽ añurõ wéégũ, tojo weecu niwĩ. Cũ marĩrẽ añurõ weesere masĩato nígũ masĩsere, tũ'omasĩsere marĩrẽ o'oyũ'rumajãcu niwĩ.

⁹ Marĩrẽ cũ weesĩ'rĩ'que, toduporo masĩno'ña marĩ'quere masĩcã weecu niwĩ. Cũ Jesucristo wẽrĩse me'rã cũ yarãrẽ “Añurõ weetu'ajanũ'cõgũti” ní'quere masĩcã weecu niwĩ.

¹⁰ A'ti ʉmũco pe'ticã, nipe'tise Õ'acũ “A'tiro wa'arosa'a” ní'caronojõta wa'arosa'a. Tojo wa'acã, cũ ʉa'caronojõta weegusami. A'tiro weegusami. Cũ nipe'tirã ʉ'musepu nirã, a'ti nucũcãpu nirãrẽ Cristore na dupoã sõrõgũsami.

¹¹ Õ'acũ marĩrẽ Jesucristo me'rã ni'cãrõ me'rã nidutigũ duporopũ beseyucu niwĩ. Marĩrẽ

cũ “O'oguti” ní'quere ñe'edutigũ tojo weecũ niwĩ. A'te nipe'tise cũ “Weeguti” nise cũ wãcũyu'quepu ni'i. Cũ nipe'tise añutu'sa'a nisere weesami. ¹² Cũ a'tiro wéégũ, ãsã Cristore ějõpeomu'târãrẽ añurõ weecã Ɂagũ besecũ niwĩ. Ësã añurõ weese me'rã masã cũ Õ'acũ nise pacare añurõ wãcũato nígũ tojo besecũ niwĩ. ¹³ Cristo curusapu wẽrĩ'que me'rã musã quẽ'rã Õ'acũ yarã wa'awũ. Musã diacjũ cjase Cristo ye quetire tu'orã, cãrẽ ějõpeowũ. Cũ ye queti a'tiro ni'i. Marĩ pecame'epũ wa'abo'cãrãrẽ yu'rũweticã weecũ niwĩ. Cãrẽ ějõpeocã, Õ'acũ musãrẽ cũ yarã tojacã weecũ niwĩ. Yarã nima nisere ï'osĩ'rĩgũ, musãrẽ Espíritu Santure o'ócũ niwĩ. Espíritu Santu Õ'acũ “Musãrẽ o'óguti” ní'cũta nimi. ¹⁴ Õ'acũ Espíritu Santure marĩrẽ o'otojacũ niwĩ. Tojo weerã marĩ masĩ'i. Diacjũta nipe'tise cũ “O'oguti” ní'quere o'ogũsami. Cũ o'ootjere yu-cuerã wee'e. Cũ yarã nipe'tirã ña'arõ weeseti nimi'cãrãrẽ yu'rũwetipe'ticã weegũsami. Tojo wéeca be'ro cũ “O'oguti” ní'quere o'ogũsami. Cũ tojo weecã ï'arã, masã Õ'acũrẽ “Añubutiagu nimi”, nirãsama.

Pablo Éfesocjãrãrẽ sẽrĩbosase ni'i

¹⁵⁻¹⁶ Yu'u musã añurõ weesere masĩ'i. Musã marĩ wiogu Jesure ějõpeo'o. Tojo nicã nipe'tirã Õ'acũ yarãrẽ ma'i'i. Musã tojo weecã wãcũgũ, yu'u Õ'acũrẽ sẽrĩbosasetirinucũ cãrẽ e'catise o'onu'cũ'u. ¹⁷ Õ'acũ, marĩ wiogu Jesucristo

pacu añubutiagu nimi. Cūrē masā ye niat-jere a'tiro sērībosa'a: “Ō'acū, Espiritu Santu tu'omasise o'oato narē. Mu'u ye cjasere añurō ī'oato. Nemorō mu'urē masīdutigū tojo weeato. ¹⁸ Ō'acū, na tu'oña'rōpu mu'u ye cjasere masīcā weeya. Mu'u narē añurō weesī'rīgū besecu niwū. Nipe'tirā mu'u yarārē añubutiasere o'ogusa'a. A'tere narē añurō masīcā weeya. ¹⁹⁻²⁰ Mu'u tutuayu'rugū ni'i. Mu'u tutuase ne pe'tisome. Te me'rā ūsā Jesucristore ējōpeorārē ducayugu wee'e. Mu'u tojo weesere narē masīcā weeya”, ni sērībosa'a. Ō'acū tutuase a'tiro ni'i. Cū, cū tutuase me'rā Cristo wērī'cupure masācā weecu niwī. Cū masāmujāāca be'ro cūrē cū tiro u'musepu wiogu dujiri cūmurō diacijū pe'e dūpocu niwī. Cū tutuase me'rāta cū uaronojō marīrē ducayugu weemi. ²¹ Ō'acū Cristore a'tiro weecu niwī. Nipe'tirā a'ti nucūcāpu nirā, u'musepu nirā, na wiorārē, no'o āpērārē dutirānojōrē na bu'ipū tojacā weecu niwī. A'ti umucopū, ape umucopure tojota weenu'cūcūsami. ²² Ō'acū nipe'tisere, nipe'tirārē Cristo doca tojacā weecu niwī. Tojo nicā nipe'tirā Cristore ējōpeose cururicjārā dupoā sōrōcu niwī. ²³ Nipe'tirā cūrē ējōpeose cururicjārā ni'cā curua nima. Ti curuacjārā cū upū weronojō nima. Tojo nicā Jesucristota nipe'tiropū nibi'acā'sami. Cūrē ējōpeose cururicjārā cū uaro weemasīma. Tojo weero narē añurō weemasise dū'sawe'e.

Õ'acũ marĩrẽ ma'ígũ yu'rũo'que ni'i

¹ Toduporopu Cristore ejõpeose duporo musã ña'arõ weecārã niwũ. Musã ña'arõ wee'que bu'iri Õ'acũ i'orõpure wẽrĩ'cārã weronojõ nicārã niwũ. ² Āpẽrã a'ti turicjārã weronojõ ña'arõ weenu'cũcārã niwũ. Wātĩa wiogu uaronojõ weecārã niwũ. Cũ a'ti turicjārã Õ'acũrẽ yu'rũnu'cārãrẽ dutigu nimi. ³ Toduporo marĩ nipe'tirã tojota ña'arõ weenu'cũwũ. Ña'arõ weesĩ'rĩsere uaripejawu. Marĩ no'o uaro weesĩ'rĩsenojõrẽ, ña'arõ wãcũsenojõrẽ weewu. Tojo weerã marĩ quẽ'rã Õ'acũrẽ bu'iri da'reno'bopã. Āpẽrãrẽ pecame'epu cõ'a, bu'iri da'rero weronojõ da'reno'bopã. ⁴ Cũ pe'e marĩrẽ uputu ma'ígũ, pajaña'se cuoyu'ruawĩ. ⁵ Marĩ ña'arõ wee'que bu'iri Õ'acũ marĩrẽ “Wẽrĩ'cārã weronojõ nima”, ni i'awĩ. Cristore ejõpeoca be'ro marĩrẽ “Cristo me'rã ni'cārõ me'rã nima”, ni i'asami. Cũ Cristore masõ'caronojõta marĩ quẽ'rãrẽ catise pe'titisere o'ocu niwĩ. Tojo weegu Õ'acũ marĩrẽ pajaña'gũ, ña'arã nimi'cārãrẽ yu'rũocu niwĩ. ⁶ Õ'acũ Jesucristore masõcu niwĩ. Cũrẽ masõ'caronojõta marĩ Jesucristo yarãrẽ masãmujãa'cārã weronojõ weecu niwĩ. Jesucristo u'musepu wiogu dujiri cūmurõ dujironojõta marĩrẽ cũ me'rãta tja u'musepu dujiyutojarã weronojõ nicã weecu niwĩ. Ña'arõ nisetise me'rã nisome majã. ⁷ Jesucristo cũ wẽrĩbosa'que me'rã marĩrẽ ma'isere, cũ añubutiaro weesere i'ocu niwĩ. Be'ropu nipe'tirãrẽ tere masĩcã uagu tojo weecu niwĩ. ⁸ A'tiro ni'i. Marĩ Jesucristore ejõpeorã

Õ'acũ añurõ weese me'rã yu'rũwũ. Te marĩ basu wee'que mejẽta ni'i. Õ'acũ pe'e marĩrẽ yu'rũowĩ. ⁹ Marĩ añurõ weesere ï'agũ mejẽta yu'rũowĩ. Tojo weegu ne ni'cũ “Yu'u añurõ wee'que wapa Õ'acũ yu'ure yu'rũowĩ”, nita basiowe'e. ¹⁰ A'tiro ni'i. Marĩ cũ wee'cãrã ni'i. Jesucristo ya curuacjãrã nidutigu tojo weecu niwĩ. Duporopu marĩ añurõ weeatjere wãcũyutojacu niwĩ. Tere añurõ weedutigu marĩrẽ Jesucristo yarã wa'acã weecu niwĩ.

Marĩ Jesucristo me'rã añurõ nicã'a nise ni'i

¹¹ Mũsã toduporopu niseti'quere wãcũña. Mũsã judío masã niwe'e. Tojo weerã judío masã õ'rẽcju yapa caserore yejecõ'arã, a'tiro nisama mũsãrẽ: “Na yejecõ'ano'ña marĩrã nima.” Na basu pe'e “Ûsã yejecõ'ano'cãrã Õ'acũ yarã ni'i”, nimisama. Mũsã pe'ere “Õ'acũ yarã nitima”, nisama. Tojo weese upupu weese dia'cũ ni'i. Tojo weese masãrẽ Õ'acũ yarã wa'acã weewe'e. ¹² Titapure mũsã ejõpeose duporo Cristore moocãrã niwũ. Mũsã Õ'acũ yarã Israe curuacjãrã me'rã niticãrã niwũ. Õ'acũ Israe curuacjãrãrẽ a'tiro nicu niwĩ: “Narẽ añurõ weeguti. Na wioгу nigũti. Yarã nirãsama”, nicu niwĩ. Mũsã pe'ere tojo niticu niwĩ. Mũsã Õ'acũ ãsãrẽ yu'rũogusami nisere masĩticãrã niwũ. Õ'acũrẽ moocãrã niwũ. ¹³ Ni'cãrõacã pũricãrẽ mũsã Jesucristore ejõpeorã ni'i. Tojo weerã toduporopu cãrẽ masĩtimi'cãrã cũ yarã wa'acãrã niwũ. Cristo cũ wẽrĩse, cũ dí o'maburose me'rã mũsãrẽ cũ yarã wa'acã weecu niwĩ.

14 Cristo nimi marĩrẽ ejerisājāsere o'ogu. Cúta marĩrẽ judío masārẽ, judío masã nitirārẽ ni'cã curuacjārã wa'acã weecu niwĩ. Marĩ a'merĩ ĩ'asĩ'rĩtimi'quere du'ucã weecu niwĩ. 15 Cũ wẽrĩse me'rã Moisé duti'quere wéerã, ne ni'cũ yu'rũwetimasĩtimi nisere masĩcã weecu niwĩ. Tojo weegu Cristo pua curua nimi'cãrãrẽ cãrẽ ějõpeocã ĩ'agũ, ni'cã curuata weecu niwĩ. Tojo weese me'rã marĩrẽ añurõ ni'cãrõ me'rã nisetiã weecu niwĩ. 16 Cũ curusapu wẽrĩse me'rã marĩrẽ judío masārẽ, judío masã nitirã me'rã a'merĩ marĩ pe'sutisere du'ucã weecu niwĩ. Cũ wẽrĩse me'rãta tja marĩ pua curua nimi'cãrãrẽ ni'cã curua weecu niwĩ. Tojo nicã te me'rãta Õ'acũ ĩ'orõpure marĩrẽ añurã wa'acã weecu niwĩ.

17 Cristo a'ti nucũcãpu a'tigu, “Õ'acũ masã me'rã añurõ nisetisere apogu a'tiwu”, ni werecu niwĩ. Ësã judío masã Õ'acũ yere masĩ'cãrãrẽ werecu niwĩ. Tojo nicã musã quẽ'rã judío masã nitirã, Õ'acũ yere masĩti'cãrãrẽ te que-tire werecu niwĩ. 18 A'tiro ni'i. Jesucristo wẽrĩse me'rã marĩ judío masã, judío masã nitirã nipe'tirã marĩ pacu Õ'acũrẽ sërĩmasĩ'i. Cũrẽ ějõpeo, masĩta basio'o. Cũ tiropu wa'amasĩ'i. Espíritu Santu ni'cũ nigũ cã weetamuse me'rã tojo weeta basio'o. 19 Tojo weerã musã judío masã nitirã Õ'acũ ĩ'orõpure apesecjārã sijari masã weronojõ niwe'e. Õ'acũrẽ masĩtirã weronojõ niwe'e. A'tiro pe'e ni'i. Judío masã Cristore ějõpeorã weronojõta Õ'acũ ya curu-acjārã ni'i. Nipe'tirã Cristore ějõpeorã me'rã

ni'cã pō'rã, Õ'acũ pō'rã ni'i. ²⁰ Marĩ nipe'tirã Jesucristore ějōpeorã ni'cã wi'i yéeca wi'ijo weronojō ni'i. Ti wi'i yeenu'cã'que a'tiro ni'i. Jesucristo besecũ'cãrã, tojo nicã Õ'acũ were-duti'quere wereturiari masã musârẽ ne waro bu'edũ'pocãticãrã niwã. Tere tũ'orã, ějōpeocãrã niwã. Na ne waro yeenu'cãcaga ũtãgã weronojō Jesucristo nimi. ²¹ Yeenu'cãcaga ũtãgã me'rã nipe'tise ti wi'i cjase queoro ninu'cũcã'a. Nipe'tise apeye ũtãpaga tiga yeenu'cãcaga ũtãgã me'rã yee a'mesũ'ono'o. Queoro tiga me'rã añurō yeeturiamujãno'o. Tojo weronojō Cristo marĩ cũrẽ ějōpeocã, ãpẽrã todũporo ějōpeorã me'rã añurō a'mesũ'acã weemi. ãpẽrã cũrẽ ějōpeowã'cãcã, cũta tja marĩ nipe'tirãrẽ ni'cã curua, pajiri curua wa'acã weemi. ãpẽrã marĩ nipe'tirãrẽ ĩ'arã, wiopesase me'rã “Õ'acũ ya curua ni'i”, nirãsama. ²² Musã quẽ'rã judío masã nitirã ãpẽrã Jesucristore ějōpeorã me'rã a'mesũ'a, Õ'acũ ya curuacjãrã toja'a. Õ'acũ Espíritu Santu me'rã musãpure nimi.

3

Pablo “Judío masã nitirãrẽ bu'edutigu cũuno'wũ” ní'que ní'i

¹ Õ'acũ musârẽ ma'ígũ, añurō weecu niwĩ. Cũ tojo weesere wãcũgũ, cũrẽ e'catipeo'o. Yũ'u Pablo musã judío masã nitirãrẽ Jesucristo ye quetire werese wapa, bu'iri da'reri wi'ipũ ni'i. ² Musã masĩsa'a, Õ'acũ musârẽ pajaña'gũ, añurō weesĩ'rĩgũ, yũ'ure a'tiro weredutiwĩ. Judío

masã nitirã quẽ'rãrẽ yu'ruomi nisere weredu-tiwĩ. ³ Õ'acũ toduporopu masĩno'ña marĩ'que quetire yu'ure bajuyoropu ï'owĩ. Tere “Judío masã nitirãrẽ añurõ weeguti” ní'quere yu'ure masĩcã weewĩ. Yu'u musãrẽ a'te duporo pe-jetipawa ojatojapu. ⁴ Musã tere bu'érã, yu'ure “Cristo ye queti, toduporo masĩno'ña marĩ'que quetire cũ masĩmi”, nirãsa'a. ⁵ Duporocjãrã Õ'acũ judío masã nitirãrẽ ñe'egũsami nisere masĩticãrã niwã. Ni'cãrõacã pũricãrẽ Espiritu Santu me'rã cũ yarã, cũ besecũú'cãrãrẽ weremi. Tojo nicã tere cũ wereduti'quere wereturiari masãrẽ weremi. ⁶ Te toduporo masĩno'ña marĩ'que queti a'tiro ni'i. Judío masã ni-tirã Jesucristore ejõpeorã, judío masã weronojõ Õ'acũ põ'rã sãjãrãsama. Na quẽ'rã cũ o'oatjere ñe'erãsama. Na puã curua nimi'cãrã ni'cã curua nirãsama. Õ'acũ “Judío masãrẽ Jesucristo me'rã añurõ weeguti”, nicu niwĩ. Cũ tojo ní'quere judío masã nitirã quẽ'rãrẽ weegusami.

⁷ A'te quetire Õ'acũ yu'ure weredutigũ cũuwĩ. Yu'u ña'agũ nimicã, yu'ure añurõ wéégũ, cũ tu-tuaro me'rã tojo cũuwĩ. ⁸ Yu'uta mejõ nigũ waro nipe'tirã Õ'acũrẽ ejõpeorã docapu tu'oña'a. Tojo nimicã, yu'ure añurõ weesĩ'rĩgũ, a'tiro weecu niwĩ. Judío masã nitirãrẽ cũ bese'cu Cristo ye añuse quetire weredutiwĩ. Te queti a'tiro ni'i. Õ'acũ Jesucristo me'rã añubutiasere marĩrẽ weemi. Te añusere marĩ wãcũpõtẽowe'e. ⁹ Apeyere Õ'acũ nipe'tirã te queti toduporocjãrã masĩti'quere masĩato ní'gũ yu'ure o'ówĩ. Cũ

nipe'tisere wee'cu te quetire maata wereticu niwĩ. Te queti cũ ne waro wăcũyu'que a'tiro ni'i. "Judío masă nitiră judío masă weronojō Ō'acũ pō'ră nirăsama" ní'que ni'i. ¹⁰ Tojo weero ni'cărōacărē Jesucristore ějōpeori curuacjāră me'ră a'tiro wa'a'a. Na peje cururi nimi'cără ni'că curua wa'acă ĩ'ară, ɯ'musecjāră wioră, tojo nică wătĩ yară tutuară a'tiro nisama: "Ō'acũ masĩɯ'ruami. Añubutiaro wăcũse cuomi", nisama. ¹¹ Ne waropɯ Ō'acũ "Tojota peje cururicjārărē ni'că curua wa'acă weeyapatiguti", nicu niwĩ. Cũ ní'caronojōta Jesucristo marĩ wiogu me'ră queoro wa'acă weecu niwĩ. ¹² Cristo me'ră marĩ Ō'acūrē masĩta basio'o. Jesucristore ějōpeotjīară, uiro marĩrō "Marĩrē ñe'egūsami", ni'i. Cūrē sērĩmasĩ'i. ¹³ ɲu'ɯ musārē were'que bu'iri pi'eti'i. Musārē a'tiro weecă ɯa'a. ɲu'ɯ pi'etisere wăcūră, bujawetitică'ña. Pi'etigu, Ō'acũ musārē añurō wee'quere âpērărē wăcũcă wee'e.

Cristo masārē ma'isere masĩato nígũ, Pablo sērĩbosase ni'i

¹⁴ Ō'acũ, marĩ wiogu Jesucristo pacure e'catipeo'o. Musă judío masă nitirărē añurō weesere wăcũgũ, tojo wee'e. ¹⁵ Ō'acũta pacu nimɯ'tă'cu nimi. Cũ me'ră pacu nise nɯ'că'a. Cũ nipe'tise cururicjāră ɯ'musepu niră, a'ti nucũcăpu niră ni'cărō me'ră nisetiică weecu niwĩ. ¹⁶ Marĩ pacure musă ye niatjere sērĩbosa'a. Cũ añubutiagu, tutuayɯ'rugɯ nimi. Cũ Espĩritu Santu musārē wăcũtutuacă weegusami. ¹⁷ Musă Cristore ějōpeo, nemorō cũ

me'rã añurõ niato nígu sērĩbosa'a. Apeyema, musã Cristore, tojo nicã ãpērãrẽ añurõ ma'icã uagu sērĩbosa'a. ¹⁸ Musã nipe'tirã Õ'acũ yarã me'rã Jesucristo marĩrẽ ma'iyu'rũnu'cãsere masĩdutigu sērĩbosa'a. Cũ nipe'tirã masãrẽ uputu waro ma'imi. Wiorã, mejõ nirã, nipe'tirãpũreta ma'inu'cũcã'mi. Cũ ma'ise ne pe'tisome. ¹⁹ Musãrẽ cũ ma'isere masĩdutigu sērĩbosa'a. Cũ ma'isere wãcũpõtẽomasĩtisa'a. Te, cũ ma'isere masĩrã, cũ weronojõ añurã, ña'ase moorã nirãsa'a. Tojo weerã Õ'acũrẽ cuoyu'ruarãsa'a.

²⁰ Nipe'tirã “Õ'acũrẽ añuyu'ruami”, niato. Cũ nipe'tise marĩ sērĩse yu'ruoro o'osami. Marĩ wãcũ'que nemorõ o'omasĩsami. Cũ tutuaro me'rã marĩrẽ tojo weemasĩsami. ²¹ Tojo weerã Õ'acũ marĩ Jesucristore ejõpeori curuacjãrãrẽ añurõ weecã ã'arã, nipe'tirã Õ'acũrẽ e'catipeonu'cũcã'to. Tojo nicã Jesucristo masãpũre weesere ã'arã, tojota weeato. A'tocaterocjãrã, be'rocjãrã quẽ'rã tojota Õ'acũrẽ e'catipeonu'cũcã'to.

Tojota wa'arosa'a.

4

Jesucristore ejõpeorãrẽ ni'cãrõ me'rã nisetiduti'que ni'i

¹ Yu'u marĩ wiogu ye quetire werese wapa, bu'iri da'reri wi'ipu ni'i. Õ'acũ cũ tutuaro me'rã marĩrẽ añurõ weecu niwĩ. Tere wãcũgũ, musãrẽ a'tiro weecã ua'a. Musã Õ'acũ bese'cãrã

weronojōta añurō weesetiya. ² Ne ni'cũ “Āpērā yu'ruoro ni'i”, ni wācūtīcā'ña. Nitutiro marĩrō queoro weeya. Musārē ña'arō, mejēcā weecā, wācūtutuaya. Āpērārē ma'írā, queoro weeticā ĩ'arā, tojo tu'oña'cā'ña. ³ Espíritu Santu musārē ni'cārō me'rā nisetīcā weemi. Musā ni'cārō me'rā añurō nisetirāti nírā, a'merĩ acobojoya. A'merĩ añurō wejepeo, cumuca marĩrō niña. ⁴ Marĩ ni'cā curuacjārā ni'i. Espíritu Santu ni'cũ nigũ, marĩ nipe'tirāpure nimi. Ō'acũ u'musepu wa'adutigu marĩ nipe'tirārē beseyucu niwĩ. ⁵ Marĩ wiogu Jesucristo ni'cũta nimi. Marĩ nipe'tirā cūrē ni'cārōnojō ējōpeo'o. Jesucristore sirutusere ĩ'orā, marĩ nipe'tirā wāmeyeno'o. ⁶ Ō'acũ marĩ pacu ni'cũta nimi. Cũ marĩ nipe'tirā wiogu nimi. Cũ, cũ yarā me'rā cũ ye cjasere weemi. Cũ yarā nipe'tirāpure nimi.

⁷ Tojo nimicā, Cristo marĩrē, marĩnacūrē Espíritu Santu me'rā weemasĩsere o'ocu niwĩ.

⁸ Tojo weero Ō'acũ ye queti ojāca pūrīpu oja'caronojōta ni'i. A'tiro ojano'wā:

Cũ u'musepu mujāase duporo cūrē ĩ'atu'tirārē docaque'acā weecu niwĩ.

Cũ mujāaca be'ro masārē Espíritu Santu me'rā weemasĩsere o'ocu niwĩ.

⁹ Cũ u'musepu mujāasere ucūrā, cũ topu mujāati duporo a'ti di'tapu dijaticu niwĩ yujupu, nírā wee'e. Dijati, a'topu nicu niwĩ. ¹⁰ Cũta tja a'ti di'tapu ní'cu u'muse añubutiaropu Ō'acũ nirōpu mujāacu niwĩ. Tojo weegu nipe'tiropu dutimasĩmi. ¹¹ Jesucristo cũ yarārē, nānacūrē Espíritu Santu me'rā weemasĩsere o'ocu niwĩ.

Ni'cārērārē besecūú, cū ye queti wererā sājācā weecu niwī. Āpērārē Ō'acū cū ucūse tū'o'quere wereturiarā sājācā weecu niwī. Āpērārē, cū masārē pecame'epu wa'abo'cārārē yu'rūwetise quetire werecusiari masā sōrōcu niwī. Āpērārē, Jesucristore ějōpeorārē su'ori bu'edutigu cūucu niwī. ¹² Tojo wee cū yarārē cū ye cjasere da'rato nígū tojo weecu niwī. Cū ya curuacjārārē cū uaro weenemoato nígū tojo weemasīsere o'ocu niwī. ¹³ Tere wee, marī a'merī weetamurā, Ō'acū macūrē nemorō ějōpeonemorāsa'a. Cūrē añurō masīrāsa'a. Tojo nicā Ō'acū uaranojōta queoro weemasīnemorāsa'a. Ō'acū bese'cu Cristo nipe'tisere añurō niseticu niwī. Marī cūrē ějōpeori curuacjārā quē'rā cū weronojōta nisetirāsa'a. ¹⁴ Tojo weerā wī'marā weronojō ducayumujārā nisome. Nipe'tisetiri ma'ma bu'esere tū'orā, na'irō ducayumujāsome. Nisoome'rīrī masā marīrē mejēcā ějōpeocā weesome. ¹⁵ A'tiro pe'e bucurā weronojō weerāsa'a. Diacjū a'merī ma'i, ucūrāsa'a. Siape me'rā diacjū cjasere ějōpeotu'ajanu'cōrāsa'a. Tojo nicā, āpērārē wereyapada'reorāsa'a. Nipe'tise no'o marī weesere Cristo me'rā nīrā, cū uaro weenemorāsa'a. Cūta nimi cūrē ějōpeori curuacjārā dupoá. ¹⁶ Tojo dupoá nígū, marīrē queoro a'mesu'acā weemi. Marī upu peje ducawatimirō, ni'cā uputa ni'i. A'te weronojō marī cūrē ějōpeorārē ni'cā curuata cū me'rā ni'cārō me'rā nicā weemi. Marī ějōpeorānucū a'merī weetamurā, siape me'rā weetamuwā'cā, a'merī ma'itu'ajanu'cōrāsa'a.

Jesucristo me'rã ma'ma weesetisere boca'que ni'i

¹⁷ Marĩ wiogu dutiro me'rã musãrẽ a'tiro weeduti'i. Musã Õ'acũrẽ masĩtirã weronojõ weeticã'ña. Toduporopu weeseti'quenojõrẽ weeticã'ña. Õ'acũrẽ masĩtirã no'o ɰaro wãcũ, weema'acã'sama. ¹⁸ Na tu'omasĩtima. Na'itĩ'arõpu nirã weronojõ nima. Õ'acũ masãrẽ añurõ weesere masĩtima. Õ'acũ yere wãcũsĩ'rĩtirã, tu'omasĩtirã weronojõ nima. Tojo weerã Õ'acũ tiropu catinu'cũsome. ¹⁹ Na ña'arõ weesetisere ne bopoyatima. Na no'o ɰaro ña'arõ weebajaque'atima. Na weetũ'sase, nipe'tise ña'asere weema. Na weesere “¿Añumitito?” ni wãcũtima. ²⁰ Musã pũrĩcãrẽ Cristo Õ'acũ bese'cu tojo weesere weedutiticu niwĩ. ²¹ Musã queorota cũ ye quetire tu'orã, masĩsa'a. Cũrẽ ẽjõpeorã weesetisere Jesú bu'e'quere masĩsa'a. ²² Musã toduporopu weeseti'quema du'ucã'ña majã. Musã “Ña'arõ ɰaripejasere wéérã, e'catirãsa'a”, ni wãcũmipã. Niwe'e. Tojo weese musãrẽ dojorẽpã. ²³ Musã mejẽcã wãcũsere ducayuroɰa'a. ²⁴ Õ'acũ ɰaronojõta ma'ma weesetisere weeya. A'tiro wéérã, ăpẽrãrẽ musã queoro weerãsa'a. Tojo nicã Õ'acũ ĩ'orõpure añurã nirãsa'a.

²⁵ Tojo weerã a'merĩ nisoosere du'ucã'ña. Marĩ nipe'tirã Jesucristore ẽjõpeori curuacjãrã ni'i. Te ye bu'iri a'merĩ diacjũ ucũrõɰa'a.

²⁶ Musã uarã, ña'arõ weeticã'ña. Uana'iatĩcã'ña. ²⁷ Wãtĩ musãrẽ uadojacã weesĩ'rĩsere cã'mota'aya.

28 Toduporopu yajapo'cu yajanemoticã'to majã. Yajaronojõ o'ogu, da'rato. Tojo weegu cû basu quẽ'rã cuogusami. Cû da'ra'que wapa me'rã pajasecuorã quẽ'rãrẽ weetamumasĩgũsami.

29 Ña'asere ucũticã'ña. A'tiro pe'e weeya. Añuse, no'o masãrẽ weetamusenojõ pe'ere ucũña. Tojo weérã, musã ucũse tũ'orãrẽ añurõ weerãsa'a. 30 Nipe'tise ña'arõ weesere weeticã'ña. Espíritu Santure bujaweticã weeticã'ña. Õ'acũ Espíritu Santure o'ose me'rã musã “Õ'acũ yarã nima”, nino'o. Tojo weerã musã masĩ'i, Jesucristo a'ticãpu Õ'acũ musãrẽ añurõ yũ'rũobutiagusami.

31 Nipe'tise a'merĩ ña'arõ tũ'oña'sere, pũrĩrõ ucũsere, uayũ'rũmajãsere, a'metu'tise, uarã caricũsere, tojo nicã ãpẽrãrẽ ña'arõ ucũse quẽ'rãrẽ du'ucã'ña. Ne ni'cũrẽ ì'atu'titicã'ña.

32 A'tiro pe'e weeya. A'merĩ añurõ weetamu, pajaña'ña. Õ'acũ Cristo me'rã musãrẽ acobojo'caronojõta musã quẽ'rã a'merĩ acobojoya.

5

“Õ'acũ pũ'rãrẽ a'tiro nisetirowa'a” ní'que ni'i

1 Musã Õ'acũ pũ'rã cû mairã ni'i. Tojo weerã cû weronojõ weeya. 2 Jesucristo marĩrẽ ma'i'caronojõta a'merĩ ma'inu'cũcã'ña. Cû marĩrẽ ma'igũ, wẽrĩbosacu niwĩ. Cû wẽrĩbosa'que judío masã oveja wĩ'magũrẽ wẽjẽ, Õ'acũrẽ ãjũamorõpeo'caro weronojõ ni'i. Õ'acũ

na ãjãamorõcã, tũ'sacũ niwĩ. Te weronojõ Jesucristo marĩrẽ wẽrĩbosa'quere tũ'sacũ niwĩ.

³ Musã Õ'acũ yarã nitoja'a. Tojo weerã musã numosãnumia nitirãrẽ, marãpusumua nitirãrẽ ne a'metãrãbajaque'atiticã'ña. Nipe'tise no'o ña'arõ weesere, ña'arõ wãcũsere weeticã'ña. Tojo nicã ãpẽrã yere ãaripejaticã'ña. Ne cã'rõ ña'arõ weesere wãcũticã'ña. ⁴ Ña'asere ucũ bujicã'ticã'ña. No'o ãaro ucũma'aticã'ña. Tojo weese queoro niwe'e. Tojo weronojõ o'orã, a'tiro pe'e weeya. Õ'acũ añurõ weesere a'merĩ ucũ, cũrẽ e'catise o'oya. ⁵ Musã masĩtojasa'a. No'o ãaro a'metãrãbajaque'atirãnojo Jesucristo yarã nitima. Õ'acũ nirõpu wa'asome. Mejãrõta tja ña'asere weegũ, tojo nicã a'ti ãmũco cjase ãaripejayũ'rũnũ'cãgũ quẽ'rã cũ tiropũ wa'asome. A'ti ãmũco cjase ãaripejayũ'rũnũ'cãse Õ'acũ mejẽtare ãjõpeose ni'i. ⁶ Tũ'omasĩña. Õ'acũ te ña'ase weerãrẽ cũrẽ yũ'rũnũ'cãrãrẽ pecame'epũ bu'iri da'regusami. Na ña'arõ weesere “Añuse ni'i”, nibosama. Na tojo ucũmaasooesere ne ãjõpeoticã'ña. ⁷ Õ'acũrẽ yũ'rũnũ'cãrãrẽ na ña'arõ weesere ne cã'rõ bu'ipejatamuticã'ña.

⁸ Musã toduporopure ña'arõ weesetirã, na'itĩ'arõpu weronojõ nicãrã niwũ. Õ'acũrẽ masĩticãrã niwũ. Ni'cãrõacã pũrĩcãrẽ marĩ wiogũ yarã nĩrã, bo'reyuropũ nĩrã weronojõ ni'i. Õ'acũ ye cjasere masĩ'i. Cũ yarã weronojõ weesetiya. ⁹ Marĩ bo'reyuropũ nĩrã, ãpẽrãrẽ añurõ wee'e. Tojo nicã weesoosere marĩrõ Õ'acũ ãaronojõ queoro wee'e. ¹⁰ Nipe'tise musã

weesenojõrẽ “¿Marĩ wiogu e'catigusari?” ni wãcũña. ¹¹ Jesucristore ãjõpeotirã na'itĩ'arõpu nĩrã weronojõ nisama. Na no'o ɯaro weema'asama. Musã na weronojõ weeticã'ña. A'tiro pe'e weeya. Na weesere “Ña'ase Õ'acũ weedutitise ni'i” ni, bajuyoropu ã'oña. ¹² Na ya'yioropu ña'arõ weesere marĩ ucũcã, bopoyo ni'i. ¹³ Bo'reyuropure nipe'tise baju'u. Marĩ na ña'arõ wee'quere ña'a ni'i nĩrã, bajuyoropu ã'o'o. Tojo weecã, na ña'arõ weesere masĩsama. Masĩrã, na quẽ'rã ducayubosama. ¹⁴ Tojo weero Jesucristore ãjõpeotirãrẽ a'tiro ucũno'o: Mu'ũ cãrĩgũ, tu'omasĩtigũ weronojõ ni'i.

Wã'cãña.

Õ'acũ ã'orõpũrẽ wẽrĩ'cu weronojõ ni'i.

Tojo nimigũ, masãña.

Tu'omasĩña.

Cristo Õ'acũ bese'cu musãrẽ bo'reyuropu nĩrãrẽ weronojõ weegusami, nino'o.

¹⁵ Tojo weerã musã weesere añurõ wãcũcasanu'cõña. Õ'acũ yere masĩtirã weronojõ niticã'ña. Cũ yere masĩrã weronojõ pe'e añurõ niña. ¹⁶ A'tiro nicã peje ña'ase ni'i. Tojo nimicã, a'tiro weeya. Nipe'tise musã weesetisetirinucũ Õ'acũ ɯaro weeya. ¹⁷ No'o ɯaro weema'aticã'ña. “¿Ñe'enojõ pe'e Õ'acũ ɯase niti?” ni wãcũña. ¹⁸ Que'aticã'ña. Tojo weese yapatidijase ni'i. E'catisĩ'rĩrã, Espĩritu Santure cuoyu'rãmajã niña. ¹⁹ Õ'acũ ye basasere, Salmo wãmetiri pũrĩpu oja'quenojõrẽ a'merĩ wereya. Marĩ wiogure uputu e'catipeose me'rã basapeoya. ²⁰ Marĩ wiogu Jesucristore

ējōpeorā, nipe'tisere Ō'acū marī pacure e'catise o'onu'cūcā'ña.

Ni'cā wi'icjārā Jesucristore ējōpeorārē dutise ni'i

²¹ Cristore mūsā ējōpeose bu'iri wiopesase me'rā a'merī l'aña.

²² Marāpūtirānumia, marī wiogure yu'ti ējōpeoronojōta mūsā marāpūsumuarē yu'ti ējōpeoya. ²³ A'tiro ni'i. Cristo cūrē ējōpeori curuacjārā dupoā nimi. Tojo weronojō marāpūtigore co marāpu co wiogu weronojō nimi. Apeye quē'rārē Cristota cū ya curuacjārārē yu'ruogu nimi. Marī cū ya upəcjārā ni'i. ²⁴ Marī cū ya curuacjārā cū dutise doca ni'i. A'te weronojō marāpūtirānumia quē'rā nipe'tise na marāpūsumua dutise doca nīrōu'a.

²⁵ Cristo cū ya curuacjārārē ma'igū, marī ye niatjere wērībosacu niwī. Cū ma'i'caronojōta, numotirā, mūsā numosānumiarē ma'iña.

²⁶ Jesucristo cū ya curuacjārārē cū yarā nidutigu tojo wērībosacu niwī. Cū ye quetire ējōpeocā, marī ña'arō wee'quere cō'a ducayucā weemi. Aco me'rā ū'irītisere coero weronojō weemi.

²⁷ Cū, cū ya curuacjārārē añubutiarā cuoguti nígū, tojo weemi. De'ro nise ña'ase moorā, bu'iri marīrā wa'acā weemi. ²⁸ Jesucristo cū ya curuacjārārē ma'i'caronojōta, mūsā numotirā, mūsā numosānumiarē ma'irōu'a. Mūsā basu ma'irōnojōta ma'iña. No'o cū numorē maigūnojō cū basu ma'igū weemi. ²⁹ A'tiro ni'i. Ne ni'cū cū upure ma'iticā weetimi. A'tiro pe'e weemi. Añurō ba'a, cū upure co'temi. Cristo cū ya curuacjārārē tojota weemi. Marīrē ma'igū,

añurõ co'temi. ³⁰ Marĩ cữrẽ ějõpeori curuacjārã cữ ya upu ni'i. ³¹ Ō'acũ ye queti ojáca pũrĩpu a'tiro ojano'wũ:

Tojo weegu numotigu cữ pacusumua me'rã ní'cu narẽ wijagusami.

Wija, cữ numo me'rã nigũsami.

Ō'acũ ĩ'orõpũre na pũarã ni'cã upu nirāsama, ni ojano'wũ.

³² Te tu'ota basiotise paca ni'i. Tojo nimicã, yu'u pe'e Cristo, tojo nicã cữrẽ ějõpeori curuacjārārẽ na ni'cã upu nima nisere ucũ'u. ³³ Tojo nimigũ, a'te quẽ'rārẽ nigũti. Numotirãnucũ musã basu ma'irõnojõta musã numosãnumiarẽ ma'ĩna. Numia quẽ'rã, musã marãpusumuarẽ añurõ yu'ti ějõpeoya.

6

¹ Wĩ'marã, ma'mapjia, Jesucristore ějõpeorã musã pacusumua dutisere añurõ yu'tiya. Tojo weese añu ni'i. ²⁻³ Duporopu Ō'acũ Moisére cữ dutisere cũucu niwĩ. Ni'cãrõ dutisere a'tiro nicu niwĩ: “Musã a'tere yu'ticã, añurõ weeguti”, nicu niwĩ. A'tiro nicaro niwũ: “Musã pacu, musã pacore ějõpeoya. Musã tojo wéérã, e'catirãsa'a. A'ti nucũcãpũre yoacã catirãsa'a”, nicu niwĩ.

⁴ Pacusumua, musã pũ'rārẽ na'irõ tu'titicã'ña. Na uacã weeticã'ña. A'tiro pe'e weeya. Queoro weesere bu'emasõña. Na ña'arõ weecã, “Tojo weeticã'ña”, niña. Narẽ marĩ wiogũre ějõpeocã, cữ Ɂarõnojõta weecã weeya.

⁵ Da'raco'teri masã, musã wiorã na dutisere yu'tiya. Jesucristore da'raco'terã werõnojõ

añurõ weesooro marĩrõ wiopesase me'rã narẽ
ẽjõpeoya.

⁶ Na ì'orõpure añurõ da'raya. Na ì'atiropu
quẽ'rãrẽ mejãrõta weeya. Musã wiorã ì'orõpu
dia'cũ añurõ da'rarã, nisoorã weebosa'a.
Musã wiorã “Añurõ da'rami”, ni wãcũdutarã
weebosa'a. Tojo weeticã'ña. Jesucristore
da'raco'terã weronojõ Õ'acũ ɰaronojõ
añurõ tu'sase me'rã da'raya. ⁷ E'catise
me'rã Jesucristore da'rabosarã weronojõ
tu'oña'ña. Masã dia'cũrẽ da'rabosarã weronojõ
tu'oña'ticã'ña. ⁸ Musã masĩtoja'a, marĩ wiogu
marĩnucũrẽ wapayegusami. Da'raco'teri masã,
da'raco'tetirãrẽ mejãrõta marĩ añuse wee'caro
ejatuario wapayegusami. Tojo weerã añurõ
da'raya.

⁹ Dutiri masã, musã quẽ'rã mejãrõta musãrẽ
da'raco'terãrẽ añurõ weeya. Narẽ ña'arõ
tuunrũticã'ña. Wãcũña, musã quẽ'rã na
weronojõ ɰ'musepure ni'cũ wiogu cuo'o. Cũ
pũricã nipe'tirã masãrẽ ne ducawaaro marĩrõ
ni'cãrõnojõ ì'asami.

Õ'acũrẽ ẽjõpeorã a'tiro weeroɰa'a nise ni'i

¹⁰ Ni'cãrõacãma a'tiro ojaguti. Acawererã,
musã marĩ wiogu me'rã ni'i. Tojo weerã
cũ tutuayɰruse me'rã wãcũtutuaya. ¹¹ Wãtĩ
musãrẽ nisoome'ricã, Õ'acũ weetamuse me'rã
cã'mota'aya. A'tiro weronojõ ni'i. Ni'cũ surara
a'mewẽjẽrõpu wa'agu, cũ upure cã'mota'agu
cõmesapeare, cõmesu'tirote sãñasami. Tojo
weronojõ Õ'acũ marĩrẽ tutuarã nidutigu o'osere
cuoya. Tere cuorã, wãtĩ ña'arõ weesere

cã'mota'amasĩrãsa'a. ¹² Marĩ Õ'acũ ɰaro weesĩ'rĩrã, a'mequẽrã weronojõ ni'i. Masã me'rã a'mequẽrõ weronojõ niwe'e. Wãtĩa wiorã tutuarã me'rã a'mequẽ'e. Wãtĩa a'ti ɰmũco cjase ña'arõ weesere dutirã nima. Na pãjãrã bajutirã masãrẽ wãcũsepũ ña'arõ weedutirã niquẽsãsama. ¹³ Tojo weerã nipe'tise Õ'acũ musãrẽ tutuarã nidutigũ o'osere cuoya. Tere cuorã, nipe'tisetirinucũ wãtĩ musãrẽ ña'arõ weeduticã, tutuarãsa'a. Musã a'tiro weẽca be'ro wãcũtutuarã waro nirãsa'a. Tojo weerã surara a'mewẽjẽrõpũ wa'agu, nipe'tise cõmesu'tire wejesãña'caro weronojõ weerãsa'a. ¹⁴ Surara cũ yaro su'tiro bu'i ejeritusami. Be'ro cũ cutiroke cã'mota'agu cõmesu'tiroke sãñasami. A'te weronojõ musã Õ'acũ o'ose me'rã tutuarã niña. Surara ejeritu'caro weronojõ Õ'acũ ye ucũse diacjũ cjasere añurõ tũ'onũrũña. Surara cũ cutiroke cã'mota'asami. Cũ cã'mota'aro weronojõ musã quẽ'rã a'tiro weeya. Wãtĩ ña'arõ weesere cã'mota'ajã, Õ'acũ weetamuse me'rã añurõ weeya. ¹⁵ Surara a'mewẽjẽgũ wa'ase dũporo cũ dũ'pocãrĩrẽ cã'mota'ato nĩgũ sature sãñasami. Cũ weronojõ musã quẽ'rã Jesucristo ye quetire wererãti nĩrã, wãcũyuya. A'te queti a'tiro ni'i. Jesucristo wẽrise me'rã Õ'acũ masãrẽ yũ'ruocu niwĩ. ¹⁶ Apeye quẽ'rãrẽ upure cã'mota'ari pa'marẽ cuosami. Cũ me'rã a'mewẽjẽrã, na buesepagu pecame'e me'rã cuosere ti pa'ma me'rã cã'mota'acjũ tojo weesami. A'te weronojõ wãtĩ musãrẽ ña'arõ weesĩ'rĩsere cã'mota'arã

Õ'acũrẽ ejõpeoya. A'tiro niña: “Yũ'ure añurõ yũ'rũweticã weegũsami”, ni ejõpeoya. ¹⁷ Surara cũ dupoare cã'mota'asĩ'rĩgũ cõmesapeare pesasami. Cũ weronojõ wãtĩ musã wãcũsere dojorẽsĩ'rĩcã, “Õ'acũ yũ'rũono'cãrã ni'i”, niña. Apeye quẽ'rãrẽ surara a'mewẽjẽsĩ'rĩgũ pajiri pjĩ di'pjĩjore miasami. Cũ weronojõ musã quẽ'rã Espĩritu Santu o'óca pjĩrẽ cũoya. Ti pjĩ Õ'acũ ucũse nisĩ'rĩrõ wee'e. Cũ ucũse me'rã wãtĩrẽ cã'mota'amasĩ'i. Tojo nicã nipe'tise ña'asere cõ'amasĩ'i. ¹⁸ Nipe'tise ña'asere, wãtĩarẽ cã'mota'arã Õ'acũrẽ sẽrĩnu'cũcã'ña. Espĩritu Santu weetamuse me'rã sẽrĩña. Tũ'omasĩse me'rã sẽrĩdu'utirãta, nipe'tirã cũ yarãrẽ sẽrĩbosanu'cũcã'ña. ¹⁹ Yũ'ũ quẽ'rãrẽ sẽrĩbosaya. Yũ'ũ Õ'acũ yere weresetirinucũ cũ ucũsere yũ'ure o'oato. “Uiro marĩrõ Jesucristo ye quetire masã masĩno'ña marĩ'quere wereta basiocã weeato”, ni sẽrĩbosaya. ²⁰ Õ'acũ yũ'ure a'te quetire weredutigu o'ówĩ. Yũ'ũ cãrẽ dũcayugu weronojõ ni'i. A'te quetire werese bu'iri ni'cãrõacãrẽ yũ'ũ bu'iri da'reri wi'ipũ ni'i. Topũ nimigũ, yũ'ure a'te quetire uiro marĩrõ wereato nĩrã, sẽrĩbosaya.

Pablo añudutitũo'que ni'i

²¹ Tĩquico marĩ acaweregũ weronojõ nimi. Cũ yũ'ũ ma'igũ nipe'tise yé quetire musãrẽ weregũ wa'agũsami. Cũ marĩ wiogu ye cjasere weetamugũ nimi. ²² Tojo weegũ ãsã ye quetire weredutigu cãrẽ musã tiropũ o'ó'o. Tojo o'ócã, wãcũtutuarãsama nĩgũ, tojo wee'e.

²³ Õ'acũ marĩ pacu, tojo nicã marĩ wiogu Jesucristo a'tiro weeato. Nipe'tirã musã Jesucristore ějõpeorãrẽ ejerisãjãcã weeato. Ějõpeo, a'merĩ ma'inemocã weeato. ²⁴ Õ'acũ nipe'tirã Jesucristore ma'inu'cũrãrẽ añurõ weeato.

Tocã'rõta oja'a.

Pablo

Õ'âkã hi yeere uúkũri turi Tukano New Testament in Tucano (BR:tuo:Tucano)

copyright © 2009 Wycliffe Bible Translators, Inc.

Language: Tucano

Translation by: Wycliffe Bible Translators, Inc.

Tucano [tuo], Brazil

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tucano

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-12-01

PDF generated using Haiola and XeLaTeX on 11 Nov 2022 from source
files dated 9 Oct 2020
00ebd04f-7b0d-5a72-9407-eb53ae2bd086